

宗教志卷十一

宗教

上古草昧初開渾渾噩噩無所爲教堯舜禹湯文武成康之時教亦無專稱無所謂誰氏之教者洎孔子誕生道明於下與其徒衆習禮樂訂詩書維持綱常名教於不墜非得已也亦以道不行耳孔教之名因是以著乃後世不察動摘其非屢興廢孔之議不知孔子時中因時制宜本無畸輕畸重之見道隆道污聽之後來蓋其道大而莫外非他教所可比擬也近時民權平等信教自由凡在佛老回耶諸教大率均以牖世覺民爲宗旨雖與孔教不無廣狹大小之分要之出世救世視治世法固有區別而其與人爲善則一也試思黃老學最古函谷望氣青牛度關道德五千言厥功偉矣佛陀西興釋教東漸漢唐以來宏開化宇於中邦天方性理貴重靈魂基督理道縱有殊途而一則專崇天帝博愛爲仁一則滌除嗜慾強固軀體胥於人大有裨益也蓋平人民多尙古道其對於各教崇拜者尙少夫亦尊聞行知各行其是而已

佛教

佛教者出世法也即救世法後人闢佛說興詆毀過實賢者不免亦未能深長思之耳釋迦牟尼爲佛教之祖周昭王二十四年天竺加維衛國淨飯王妃摩耶氏夢天降金人而有孕於四月八日自右脅誕生稍長即抱厭世思想欲超出生老死病四苦之外年十九入壇特山修行證道圓明正覺普照大千至穆王三年二月七日之夕入正三昧至八日明星出時成佛號世尊其後教衍西方編定經典者有弟子五百人大會於王舍城由是皈依者衆北印度王即以佛教爲國教沙彌法師徧滿國中以漸達於東土漢明帝夢見金人長大頂有光明以問羣臣言西方有神名曰佛其形長丈六尺而黃金色於是遣使天竺問佛道法遂於中國圖畫形像事之維謹此時佛教僅及內地自高勾麗據遼聘西僧宏通釋典佛教始流入遼疆迨金元以迄明清皆崛起北方俗尙佞佛崇拜釋氏至今沿爲習慣蓋佛教以博愛普度爲宗旨去階級廣慈悲頗吻合於民生主義由來者漸非偶然也本城山東山西各會館三官北極觀音財神諸廟住持僧十餘人地藏菴道林寺

有五六尼僧山野寺院各住持僧散居境內亦百餘人其中不乏清流無愧佛子第潛修韜晦人每末由物色如山東會館老僧樂亭自幼謹守清規從不染塵爲叢林巨擘邑東石佛寺僧人正禪恪守規戒恢復先世廟產尤難能者俗家父母年老迎養寺中克盡孝道即侍疾日久亦不稍嫌其痰唾污穢是殆釋而儒者也沈菊邨生時每嘖嘖稱之

道教

周柱下史老聃著道經五千言騎青牛度函谷關關尹喜望氣先知去吏而從之孔子問禮而歎其猶龍後世尊曰老子奉爲道教之祖其道以清靜無爲名溯厥由來謂寔肇於黃帝戰國時漆園叟莊周得其傳作馬蹄秋水諸篇書名莊子約十餘萬言世以老莊並稱爭衍其學說漢興曹相國參陳丞相平皆好黃老術沿至武帝信方士好神仙而煉丹服氣之說進文成五利輩遂得附會蠱惑於其間雖未至如信釋教之梁武捨身同泰餓死臺城洎輪臺下詔知悔前非已無及矣豈道教之足以誤人抑人自誤而反以失其本眞耳考之漢書藝文志載有道家言二篇神仙十家二百五卷蓋言神仙者所以保性命之眞而游求於其外者也究之去古愈遠道非其人不傳一時龍門派以邱長春爲宗當日元太祖納天道好生不嗜殺人之諫尊之爲國師道遂大行於北方久之復就衰替呂純陽心焉憫之著太乙金華宗旨一書言自太上見化東華遞傳以及南北兩宗全眞可謂極盛然盛其徒衆而衰於心傳紛紛羽士有道者伊誰吾邑之城隍廟福建三江兩會館南關之碧霞宮奉香火者僅十餘人惟邑東南赤山龍潭寺地頗幽深堪稱名勝住持數人習靜爲得其所相傳有吳道士化去其他庵觀道侶寥落若晨星上者朝夕諷經次則耕樵自給約共百人上下若福建會館住持道齊然肅讀書無多與其徒輩謹守規矩不輕出門戶是居城市而山林者推之棲眞羽流清修自矢當不止如彼其人而已此外尙有夥居道名曰道丁各有家室境內約十餘戶

回教

回教行於阿拉伯爲天方國所屬數十國以其秉禮之邦故獨稱天方即回教祖國也顧亭林日知錄以回紇與回回及回教皆屬一國誤矣按回紇即今之新疆回回即花刺子

謨居今葱嶺西鹹湖東岸之布哈拉國回教之始祖阿丹稱曰人祖即盤古氏又名亞當其降生距今七千餘歲阿丹一世至五十世穆罕默德述往聖之學而爲大成或以穆罕默德爲回教之始祖亦誤由二十一世以下拉席默之長子以思麟蓋凡三十三傳至爾薩即耶穌此其世統源流也道統始阿丹以迄穆罕默德中間爾薩去世不得其傳於是紀綱墮落異端蠱起越六百年而後穆罕默德生即中國陳太建三年驅除邪說彰明正教俾人心不致迷惑功亦偉矣其立教也以知天爲宗旨以敬事爲工夫以致命達天爲究竟稱天曰安羅昊每日拜天即朝乾夕惕之意七日以大瞻禮取七日來復之義教規惟崇拜天不事他神不立偶像不信佛法不信天主分身耶穌替罪之說以五倫名人道五典明天道五典念真禮真齋戒課賦朝壇五功天道人道兼盡者爲教中完人有經一部曰古囉阿尼即可蘭經凡六百六十六章世昭恪守縱有賢智不能踰越之考回教流傳中國迄今已一千三百餘年教徒徧布各省最盛者爲陝甘新疆次則直隸雲南而回教之傳入廣州也遠在隋代當時亞拉伯回教人每年一次航海至廣州貿易中國人不知爲回教惟知其爲

亞拉伯人耳後商務漸繁而回教人來廣州者亦漸多西曆六百二十八年即唐貞觀二年穆罕默德遣幹葛思至廣州宣傳其教建懷聖一座爲清真寺之最古者故回教徒稱幹葛思爲西來傳教老祖各省回教寺多唐朝敕建如懷聖寺則懷聖將軍所建西安禮拜寺則工部官羅天爵所建又有尉遲敬德建者均有書志唐碑匾額可據至回紇助唐和親入貢憲宗元和二年昭詔以摩尼偕來置寺處之而回回寺於是更多因回紇亦有佛教而改從回教者也貞觀五年有祆教景教波斯經教詣闕奏聞奉敕建大秦寺於長安並及天下諸州縣查大秦即羅馬統一西土漢時建都於意大利自晉而後建都於君士坦丁即今土耳其享城土耳其爲耶穌降生之地波斯亦土之東隣其初莫非耶教然回耶主義實有大不同處回教眞主獨一而耶教三位一體回教人在今世之行爲自己負責而耶穌代贖罪惡回教人生原來無罪而耶教原來有罪回教謂耶穌爲聖人爲眞主之使而耶教謂耶穌即眞主回教耶穌受厄十字架旋被救活避往加立而耶教耶穌死於十字架第三日復活肉身升天其相差如此而回教之說爲勝他如回教人不食豕肉

蓋自阿丹以來奉真宰之命不用以爲至戒且攷之醫經丹書諸說豕肉於衛生大有妨碍最宜忌食况回教人不食動物之肉頗夥非第豕也世俗不知往往滋疑本城西南隅舊有清真寺一所經掌教石萬清字秋潭創設私立清真學校教其男女子弟並聽他教人同學不示限制熊岳亦立有清真學校若湯池若萬福莊等處均有回民全境約共計三百餘戶多知向學文明漸啓不似先前之安於簡陋矣

理教

攷理道法系圖說理教始於楊祖名澄證字丹仙山東萊州即墨白馬泉鎮大楊格莊人生於明萬曆三十年夏誕降後不啼不食經嶗山道人吳一清歌示警醒少聰穎年十八入泮二十六歲舉於鄉明年成進士翰林院庶吉士改官知縣親沒辭官求道備歷艱辛遇龍舒居士引渡久之乃得五字真經及戒律八條歷數十寒暑點傳普渡功果圓滿歸岐山瀾水洞在八步險火光中化去時清康熙三十六年六月二十四日辰時至民國紀元二百五十年矣由茲理教大行以漸遍於國中中國陬海滋提倡有人迄今未衰或謂理

教組成發起於明季逸老別有深意存乎其中亦齊東之語耳教中人崇拜南海大士稱爲聖宗不許口道五字真傳謹守秘密其宗旨以立志行善爲準掌教稱理總入教者名在理切戒煙酒諸物故凡陷入阿芙蓉陣中及有劉伯倫痼疾者相率偕來虔誠懺悔回頭是岸主教凡爲人度脫先令正立門外少焉有人引入至理總坐前下參問其歸理願由告以宗規從此滌除舊習而彼岸同登矣每逢齋期在公所備辦筵席教友各持會金紛集會餐以能多食肉爲上主教升坐一日不離坐聽憑教徒次第獻茶概飲不少却足徵容受之量宏理教既奉南海大士爲尊乃齋期竟不如素而尙葷令人莫解其故殊於楊祖淡泊齋茶本旨未合或以爲齋心不齋口豈通義歟我邑理教公所先有志善堂點傳師李長青後修善堂點傳師爲馮占魁今則金萬榮爲志善堂點傳師王鳳齡爲修善堂點傳師兼充勸戒煙酒總會正理事員孫文山爲修善堂公所副所長有徽章及委任證凡屬當衆演說謂之開釋間有興辦慈善之事者老儒李天權皈依有年具知教中要旨道德淵源性命真理啓發善念滌除舊汙惟此諸大端焉耳此其教之原委也

基督一教爲新教舊教之總係教主耶蘇猶太人生於漢哀平間年三十以基督自任宣傳福音基督者救世之名義也其教以博愛爲宗旨教徒日衆反從而中傷之猶太人控於羅馬官吏耶蘇遂身殉十字架乃謂爲代萬民受罪過數百年後教行歐洲殆遍分耶蘇天主教二派天主教導源法蘭西有教皇尊嚴於上教民湏受神甫管束乏舉動自如之趣傳教者取獨身主義一生不婚娶而教中女子亦多矢志童貞終身不嫁流俗未識其用意往往不免滋疑當十六世紀日耳曼人丁路得倡宗革命推翻羅馬教皇之專制別立新教名爲耶蘇凡教士無階級爲牧師者得蓄妻室若古代修真有神仙眷屬之類盡脫除主教桎梏虐例一時信仰者歡迎樂從而新舊教門戶既分勢同水火竟演爲流血奮鬪而不惜已大違上帝一視同仁之至意天主教徒自明永樂間始入中國清康熙朝廷西人湯若望南懷仁釐訂曆象著有成績因許外人傳教於通商口岸得建設教堂若耶穌教繼起流傳在同治改元之際已後天主教二百餘年光緒末造突遭拳亂摧殘尤其

教亦幾乎熄矣迄今教徒熱心毅力仍期進行不已究之基督一教貫澈兩宗在西方傳佈共知耶蘇爲聖人自廣推行而乃欲聲教洋溢乎中國當非易易譬如一酪漿苦酒而思適五都之市張設區區食堂以大饜久啖膏粱珍奇之口得毋自召唾棄乎中華本文明古國禮教之隆甲於五洲以視四裔殊俗不啻皎日之於燭火也即以吾邑而論城內北街設有天主堂一所東南羅家哨西荒地楊木林子各村皆有天主教堂教民約有二千餘人城西門裡耶蘇教堂內兼設女小學校其教民三百餘人較天主教徒爲尠蓋以民智漸開時勢所趨之故耳彼一般奉教者每以破除迷信爲口實恒譏刺吾國人崇拜偶像爲極大錯誤胡不思教民見十字架如見耶穌十字架亦一物類經匠人工作而成獨非偶像乎各國競鑄銅像與中國之或銅或鐵或土或木者果何異乎明於責人而闇於責己亦異矣哉